

DIE MEULENAAR

Nuusbrief van die



BOND VAN DIE VERMEULEN FAMILIE

Langstraat 16 De Kelders Gansbaai 7220
Landlyn 028 384 3859
Faks na epos 086 561 6727
Selfoon 082 585 7692
Web: www.vermeulenbond.org
E-pos: vermeulenbond00@gmail.com

Jaargang 20: September 2019

VOORWOORD

Dit is weer tyd vir ons nuusbrief en ek hoop almal geniet dit.

ALGEMENE LEDEVERGADERING

'n Algemene Ledevergadering is op 13 Julie 2019 te Fochville gehou.

OPSOMMING VAN LEDEVERGADERING

Die vernaamste sake en besluite word genoem.

Voorsitter- en Finansiële verslae

Die verslae vir die periode 2018-03-01 tot 2019-02-28 is voorgelê en goedgekeur. Die vergadering besluit verder om ledegeld vir die 2020-2021 jaar dieselfde te hou.

Bond Ledetal

Dit is elke jaar moeilik om ons lede te behou en om lede te motiveer om hul ledegeld te betaal. Op ons Algemene Ledevergadering van 2018 het ons 72 lede en 5 Vriende gehad. Twee lede het gedurende die jaar bedank en 1 lid is oorlede. Dit is aangenaam om te meld dat ons vanjaar daarin geslaag het om ons ledetal te vermeerder na 76 lede en 5 Vriende.

Wysiging van Grondwet

Die Grondwet soos aan julle voorgehou, is eenparig deur die vergadering aanvaar. Die nuwe Grondwet is op ons webblad beskikbaar en enige lid is welkom om dit daar af te laai. Julle is ook welkom om een direk van ons aan te vra.

Opening van Bankrekening.

Na 'n bespreking word besluit dat 'n bankrekening in die naam van die Bond by Absa Bank geopen sal word. Lede sal ingelig word sodra dit gefinaliseer is en ons bankrekening besonderhede verander het.

Facebook Blad

Dit is aangenaam om te rapporteer dat ons facebookblad ten tye van die vergadering 483 lede gehad het, Dankie aan Giep en Stoffel wat die administrasie van die facebookblad hanteer.

Webblad

Ons webblad www.vermeulenbond.org word gereeld bygehou met nuwe artikels en interessanthede. 'n Beroep word op lede gedoen om asb. artikels en ander bydraes vir plasing na ons deur te stuur . Tans besoek tussen 60 en 70 persone per maand ons webblad. Die jaarlikse koste aan domain en subskripsie gelde beloop ongeveer R2300.

Ere-lidmaatskapsertifikate

'n Ere-lidmaatskapsertifikaat word aan Johan Vermeulen (postuum) en aan Izak Vermeulen toegeken vir hul uiters groot en waardevolle bydrae tot die stigting van die Bond. Die samestelling en uitgee van die Geslagsregister van die Vermeulen Familie in Suider-Afrika in 2004 (Eerste Druk) en in 2011 (Tweede Druk) is te danke aan hul deursettingsvermoë en navorsing. Johan was die inisieérder en stigterslid van die Bond en was die Voorsitter sedert stigting in 2000 tot 2017. Izak was nie net een van die stigtings lede nie maar dien op die bestuur sedert stigting en is nog steeds lid van die bestuur.Hul harde werk sal vir altyd behoue wees vir die Vermeulen nageslag en ons sal hulle vir ewig dankbaar wees daarvoor.

Vierung van die 20jarige bestaan van die Bond.

Soos julle weet is die Bond volgende jaar 20 jaar oud. Die Bestuur het heelwat tyd aan 'n bespreking oor hoe ons dit gaan vier of gedenk afgestaan en het tot die gevolgtrekking gekom dat ons die geleentheid moet gedenk deur 'n koffietafelboek uit te gee. Ons is tans nog besig om inligting hieroor in te win. Die bedoeling is ook dat ons dit gratis aan ons lede en Vriende beskikbaar stel en dat ons dit financier uit die Bond se opgehoupte fondse en dat lede dan net vir die verpakking en versendingkoste sal hoof te betaal.

Ons bedoeling is nie om die Geslagregister te herhaal nie en te konsentreer op hoogtepunte van ons bestaan, bydrae van die Vermeulens in ons geskiedenis, iets oor ons stamvaders, navorsers, Vermeulens se betrokkenheid in veldslae en oorloë, ons bondswapen, interessante staaltjies,gebeure en Vermeulen leiers figure ens. Dit is egter belangrik dat alles met foto's geillustreer moet word.

Ons kan nie hierdie taak alleen aanpak nie. Ons vra dus mooi dat julle eerstens kommentaar moet lewer of julle saamstem met ons idee. Ons sal enige insette verwelkom. Indien daar lede is wat 'n bydrae wil lewer deur oor enige onderwerp en dit met foto's sal illustreer , sal dit hoog op prys gestel word.

Ons soek ook iemand wat ons kan bystaan met die uitleg en tegniese versorging van die boek.

Nuwe Bestuur

Voorsitter: Hennie Vermeulen

De Kelders Gansbaai
Sel. 082 585 7692

Izak Vermeulen

Robin Hills Randburg.
Selnr.082 921 0344

Zelma Geldenhuys (Vermeulen)

La Hoff Klerksdorp
Selnr.073 144 2777

Stoffel Vermeulen

Parys Vrystaat
Selnr.081 354 4794

Net Stoffel is nuut op die bestuur en daarom word net hy hieronder kortliks bekend gestel.

Christoffel Johannes (Stoffel) Vermeulen J<2434>

Stoffel is gebore in Johannesburg en na sy Hoëskool opleiding sluit hy aan by SAPOS later TELKOM SA (Ltd) Hy was werkzaam in Johannesburg, Vereeniging, Bloemfontein asook Klerksdorp. In 2016 treë hy af saam met sy vrou, Christel in die skilderagtige Parys (Vrystaat). Hulle het twee kinders, Wynand, Celeste en drie kleinkinders. Stoffel sluit oorspronklik aan by die Bond gedurende 2016.



**Die Bestuur vir 2019-2020. V.l.n.r.
Izak Vermeulen, Zelma Geldenhuys,
Hennie Vermeulen en Stoffel Vermeulen**



Hennie oorhandig aan Izak sy ere-lidmaatskapserfikaat.

NUWE LEDE

Die afgelope verslagjaar is die volgende nuwe lede tot die Bond toegelaat. Die Bond wil graag die volgende lede baie welkom heet en vertrou dat ons verbintenis tot wedersydse voordeel sal wees.

Venita Olivier van Polokwane wat lid is vanaf 12.11.2018

Hendrik Christoffel (Hennie) Vermeulen van Pretoria wat lid is vanaf 1.11.2018

Louise Valerie Vermeulen van Melkbosstrand wat lid is vanaf 1.03.2019

Christoffel Johannes (Christo) Vermeulen van Pretoria wat lid is vanaf 6.03.2019

Petro Swanepoel van Benoni wat lid is vanaf 31 Mei 2019

Barend Johannes (Ben) Vermeulen van Kemptonpark wat lid is vanaf 31.05.2019

Andries Casper Mattheus Vermeulen van Robertson wat lid is vanaf 11.06.2019

VERMEULEN GESLAGSREGISTER STATISTIEK SOOS DIT OP 16 AUGUSTUS 2019 IN ONS DATABASE VOORKOM.

Stamvader Dirk Cornelisz	Stamvader Jan Willemz
Aantal name in register 18110	Aantal name in register 5231
Aantal persone aangedui as lewend 12329	Aantal persone aangedui as lewend 3322
Aantal persone reeds oorlede 5781	Aantal persone reeds oorlede 1909
Persoon wat oudste geword het Maria Elizabeth Vermeulen<1157> 102jr en 4 mde.	Persoon wat oudste geword het Magdalena Johanna Jacoba Basson<4375> 100jr
Aantal Mans 9081	Aantal mans 2624
Aantal vroue 8999	Aantal vroue 2595
Onbekende geslag 30	Onbekende geslag 12
Aantal huwelike 7547	Aantal huwelike 2190
Langsdurende huwelik 74jr en 11mde	Langsdurende huwelik 76jr en 10mde
Totale aantal kinders gebore 10349	Totale aantal kinders gebore 3072
Gesinne met 10 of meer kinders 110	Gesinne met 10 of meer kinders 31
Name wat meeste voorkom Jan Gabriel 111, Maria Magdalena 90, Maria Elizabeth 90, en Petrus Johannes 90	Name wat meeste voorkom Christoffel Johannes 59, Johannes Urbanus 28, Maria Magdalena 21 en Sybrand Johannes 21
Vanne van persone wat meeste met Vermeulens getroud is Van der Merwe 109, Pretorius 104, Venter 100 en Botha 98	Vanne van persone wat meeste met Vermeulens getroud is Fourie 92, Swart 90, Groenewald 73 en Du Toit 43
Plekname wat die meeste voorkom Pretoria 704, Johannesburg 369, Carnarvon 341, Victoria-Wes 321 en Bloemfontein 341	Plekname wat die meeste voorkom Napier 747, Caledon 287, Bredasdorp 268, Gansbaai 185, Stanford 162 en Hopetown 161

Wat baie interessant is, is die familiename wat die meeste voorkom by die twee stamvaders. Ons het byvoorbeeld op hierdie stadium drie Vermeulens met die geboorte name Christoffel Johannes as bondslede nl. Christo die nuwe lid hierbo genoem, Stoffel ons komiteelid en Stoffel van De Aar. Dan het ons ook nog 2 lede met die name Christiaan Jacobus een van die Strand en een van Caledon wat meebring dat ons 5 lede het met die voorletters CJ. Let ook op die plekke waar die Vermeulens hul gevëstig het. Indien jy nog altyd gewonder het waarom stamvader Dirk so baie afstammelinge het, is dit duidelik dat die 110 gesinne met 10 of meer kinders grotendeels daartoe bygedra het.

Let asb. ook daarop dat bogenoemde statistiek verkry is van die inligting wat in die database opgeneem is.

GESLAGSREGISTER

Ons het nog 6 stelle geslagsregister boeke in voorraad van die 2011 gslagsregisters teen R500 per stel vir Bondslede en Vriende en R600 vir nie-lede.

Die nuwe druk Cd/Dvd wat al die inligting van ons geslagsregisters, foto's van grafte, persone en dokumente bevat tot 31 Maart 2019 is beskikbaar teen R150 vir Bondslede en Vriende en R250 vir nie-lede. Dit sluit nie versendingkoste in nie. Julle kan ook 'n elektroniese kopie van ons geslagsregisters aanvra teen R80 per stel. Geen versendingkoste is dan ter sprake nie.

Ek wil weereens 'n beroep op lede doen om verandering van jou famile inligting, famile foto's en enige staaltjies en prestasies van die Vermeulen familie aan ons deur te gee. Dit is die enigste manier wat ons kan verseker dat ons familie geskiedenis vir ons nasate behoue gaan bly.

Die byhou van ons databasis het nie gestaak op 31 Maart 2019 nie maar gaan onverstoord voort. Help ons asseblief met hierdie belangrike taak.


NUUS VAN ORAL

IN MEMORIAM

Dit is met leedwese dat ons die dood van Bonds lid Daniël Gerhardus (Dan) Vermeulen gebore 12.01.1950 oorlede op 12.03.2017 van Botrivier bekend maak. Die Bond het eers in Maart 2019 na navrae van sy dood kennis geneem. Ons simpatie aan sy vrou Wilma en ander naasbestaandes.

GEBOORTES

Baie geluk aan Ben en Lizanne Vermeulen van Bloemfontein met die geboorte van Emma-Lee op 7.03.2017. Ben is 'n lid van die Bond vir etlike jare. Hierdie inligting moes al reeds in ons vorige uitgawe verskyn het, maar het weens 'n oorsig nie verskyn nie.



Ben en Lizanne Vermeulen met hul dogertjies Lené en Emma-Lee.

KLUB 80

Ons het 2 lede wat 80 jaar en ouer is.

Dr. Madeline Pretorius Scott gebore Vermeulen D<2157> van Pretoria het op 19 Januarie vanjaar 80 geword. Sy het 'n DPhil graad in Kriminologie en na haar eerste man William A Pretorius se dood in 2008 is sy weer op 23.09.2016 getroud met Len Scott. Die Bond wens hulle nog baie geseënde jare met goeie gesondheid toe.

Jacobus Daniël Vermeulen(Koos) D<8169> word op 19 Desember vanjaar 85 jr oud. Hy is getroud met Gesina Catharina (Sinie) gebore Nel wat reeds 83 jr oud is en hulle is reeds 61 jr getroud. Voorwaar 'n geseënde en uitsonderlike prestasie. Hy ,sy seun Johan en 3 van sy kleinkinders is Bondslede. Die Bond bid hulle baie seënwense en goeie gesondheid toe vir die toekoms.Ons is bevoordeel om julle in die Bond se geledere te hè.



Koos toe hy 83jr oud was en Sinie 81jr.



Madeline en Len Scott op haar 80ste verjaarsdag.

BYDRAE UIT MALMESBURY

Roux Vermeulen RIN D <6426>

Dr. Roux het 'n tandarts praktyk te Malmesbury. Die volgende inset is van hom ontvang op 27/11/2018:

"Verteenwoordig vanaf 2010-2014 tot 2016/7 vir SADA (Suid Afrikaanse Tandheelkunde Vereniging) op die FDI (Internasionale Tandheelkunde Federasie) en International Dental Parliament. Vanaf 2016 Vise-President vir Afrika, (ARO: African Regional Organisation of FDI), en tans President van die Afrika streek. Verteenwoordig dus tans Afrika op FDI. Word hartlik deur alle Afrika kollegas ontvang en ondersteun. Termyn het 2 September 2018 begin in Buenos Aires tydens FDI vergaderings. Was eerste voorsitter van SADA Direksie vir 4 jaar (2011-2015) en SADA president 2016-2018. So pas terug van Marrakech, Marokko, en besoek Khartoem, Sudan, van 8-10 Januarie 2019 om FDI en ARO te bemark en te verteenwoordig. Die Muslim lande nie baie betrokke, so dit is 'n forum om te network. Lisa my dogter is ook genooi, want haar tesis gaan oor implantate as verdere eienskap om 'n liggaam te identifiseer, wat nuwe navorsing is. (Sy sê maar net sy is bly pa is "well connected" om die geleentheid te kon kry!)". Die Bond wens Dr. Roux sterkte toe met sy groot taak.

BYDRAE VAN ONS LID UIT AUSTRALIË:
Dr.Leopold Petrus Vermeulen RIN J <3104>

Beste Meulenaars, dit blyk uit ons Geslagsregister van 2011 en volgens persoonlike kennisie dat die Vermeulen afstammelinge van Jan Willemesz en Dirk Cornelisz sewe professionele vlieëniers opgelewer het.

In Dirk Cornelisz se nageslag is daar Petrus Hermanus Vermeulen († 1940); Giep (Barend Johannes) Vermeulen; en Flippie (Philippus) Vermeulen en sy dogter Petro Swanepoel (Nee Vermeulen). Petro, het o.a. haar BCom graad in Lugvaartbestuur in my gewese departement by die Universiteit van Pretoria voltooi. Ek was bevoorreg om vir haar klas te gee.

Uit Jan Willemesz Vermeulen se nageslag is ek slegs bewus van Johan (Sybrand Johannes) Vermeulen († 1972) en sy seun Francois Vermeulen asook my eie seun Henco Leopold Vermeulen wat beroepsvlieëniers geword het. Henco vlieg tans vir Lion Air in Indonesië as Kaptein op die Boeing 737 Max 800-900 reeks.

Henco Vermeulen wou van kleins af 'n vlieënier word. Op skool (Oos Moot Hoërskool, Pretoria) het hy sy vakke so gekies dat dit hom toegerus het om die omvattende teoretiese en praktiese opleiding, as kommersiële- en luglyn vlieënier, suksesvol te bemeester. Sy vliegloopbaan begin toe hy in 1992 sy verpligte militêre opleiding aan die Lugmag Gimnasium te Pretoria doen en as laaimeester kwalifiseer op die Transall C-160Z vrag vliegtuig. Na drie jaar se deeltydse vlieg opleiding by die Defence Flying Club en Avex Air Training kwalifiseer hy as kommersiële vlieënier in 1995.

Sy eerste voltydse aanstelling as vlieënier was by Aircraft Operating Company Ltd (AOC) te Lanseria vanaf 1996 tot Mei 1998. Hier was hy die lugopname vlieënier vir lug skanderings, -fotografie en -karterings met 'n Cesnna 404. As programbestuurder vir die opname en skanderings operasies, was hy verantwoordelik vir die ontwikkeling van die vlug prosedures vir die gebruik van 'n Infrarooi-veelvuldige-skandeerde (IVS). Die IVS tegnologie is in Australië bekom deur die De Beers myn groep om diamant draende erts/ Kimberliet pype met behulp van lugopnames te identifiseer. Hy was die vlieënier in bevel van alle infrarooi skanderings met die IVS in 10 Afrika lande asook in Wes Australië.

Gedurende 1998 verwerf hy sy luglyn vlieënier lisensie en word hy deur SAFAIR as Eerste offisier in hulle Lockheed Hercules (L382) vloot aangestel. In 2001 word hy Senior offisier en word hy oorgeplaas op die Boeing 737-200 en B727-200 reeks. In 2005 word hy Kaptein op die Hercules L382. SAFAIR se operasionele doelwitte, lugvaart fokus en dienskontrakte het aan Henco geleenthede gebied om saam met Air Contractors and Federal Express in Wes en Sentrale Europa te vlieg en namens die Verenigde Nasies (UN) bykans al die lande in Afrika te besoek. In sy twintiger jare en vroeë dertigs was hy namens SAFAIR met die Hercules L382 betrokke by verskeie vliegkontrakte in Europa, Engeland en Ierland en het hy onder die vaandel van NATO en die UN in oorlog sones soos Kosovo (1999), East Timor (1999) en Afganistan (2005) nood bystand gelewer.

01 Kaptein Henco, Hercules L382, Afganistan 2005.

Hy was ook bevoorreg om namens Adventure Network International (ANI) op die ys in Antarktika (2000 en 2003) te land en tydens die 2007 Paris Dakar Rally / Senegal die Franse media en pers met sy Hercules L382 te vervoer. Aan die einde van 2008 bedank hy by SAFAIR en aanvaar hy 'n aanstelling as Kaptein op die Hercules (L382) by Maximus Aircargo in die Verenigde Arabiese Emirate (UAE). Hier was hy betrokke by veral die vervoer van lugvrag en passasiers asook huurvlugte na Afrika, Asië, Indië en van die Arabiese lande in die Golf

gebied, naamlik: UAE, Bahrain, Irak, Kuwait, Oman, Qatar en Saudi Arabië. In die middel van 2011, na die geboorte van sy eerste kind, sluit hy weer by SAFAIR aan as vlieënier op die Boeing 737-400 reeks. As Boeing vlieënier het hy namens SAFAIR vlugte na lande in Afrika, Europa, Asië en Australasië onderneem en was hy ook daarvoor verantwoordelik om passasiers namens Interair en Nationwide te vervoer. In 2014 het hy en sy bemanning die Sekretaris Generaal van die UN, Ban Ki-moon en verskeie lede van die Afrika Unie (AU), veilig na Mogadisjoe in die oorlog geteisterde Somalië in 'n Boeing 737-400 Kombi gevlieg. Sedert 2015 was hy kaptein op die Boeing 737-400 en 737-800 en oorwegend betrokke by die vervoer van passasiers namens FlySafair, die lae-koste lugredery van SAFAIR.

02 Captain Henco with Ban Ki-moon 2014.

03 Henco, Boeing 737-400. SAFAIR 2015.

In September 2017 tree hy in diens van Lion Air in Indonesië, met 'n vyf jaar kontrak, as Kaptein op die Boeing 737 Max 800-900 reeks. Lion Air is 'n lae-koste lugredery met sy hoofkantoor en vliegpark in Jakarta en is Indonesië se grootste privaat lugredery en die tweede grootste lae-koste lugredery in Suidoos Asië.

04 Henco, Boeing 737 MAX 800. Lion Air 2018.

Alhoewel Henco 'n baie besige vliegprogram het, met 36 moontlike destinasies in Indonesië en Suidelike Asië, kry hy vyf keer per jaar die geleentheid om sy gesin in Suid Afrika te besoek. Hy is met Vanita (nooi Prinsloo) op 13 Desember 2008 getroud en twee pragtige dogters is uit die verbintenis gebore, naamlik Kayelee en Haydee Vermeulen.



Kaptein Henco in Hercules L382 Afganistan 2005



Henco met Ban Ki-moon 2014



Henco in Boeing 737-400 2015



Henco in Boeing 737 MAX 800 2018



Henco en sy vrou Vanita UAE 2010



Hul dogtertjies Kayelee en Haydee

Saam gestel deur Leopold Petrus Vermeulen.
11.03.2019



Leopold en Valerie in 2018 by
The Pinnacles Wes-Australië

Kommentaar deur samestellers van
DIE MEULENAAR

Dr.Leo was 'n professor verbonde aan die Universiteit van Pretoria en was die Hoof van die Departement Menslike Hulpbronbestuur. Hy is die houer van 'n D.Phil graad en is 'n bedryfsielkundige. Die egpaar het in 2011 verhuis na Australië. Hulle het sedert 10 Augustus 2016 dubbele burgerskap.

Ons is ook net bewus van bogenoemde name. Moontlik is Flippie se 2 seuns Ben en Peet ook vlieëniers. Laat weet ons asb. Flippie as dit so is. Flippie en sy dogter Petro, Giep en Dr. Leopold is lede van die Bond. As daar nog Vermeulens is wat vlieëniers is waarvan julle bewus is, laat weet ons asseblief.

INTERESSANTE STORIES/STAALTJIES UIT ONS GESLAGSREGISTER SOOS OP NUWE CD/DVD VERSKYN.

Het julle geweet hoe Morelettaspruit en seker ook Morelettapark in Pretoria aan hul naam gekom het.

- "3033 e6 **Hendrik Johannes VERMEULEN** <167> (2225/x), * Colesberg 13.08.1819, † Witfontein, Potchefstroom. 04.01.1895
 »✉ Andries Francois du Toit, die eerste Landdros van Pretoria, word deur President MW Pretorius gevra om die stad Pretoria te beplan. Die plek waar die Voortrekkers hulle op Elandspoort, Daspoort, Groenkloof, Derdepoort, Garsfontein en Koedoespoort gevestig het, word op 1855-11-16 as dorp verklaar. 'n Kommissieraad van die Volksraad vergader van 27 tot 30 Mei 1856 "ten huizen van den heer Vermeulen" (Hendrik) en word bepaal dat Pretoria die hoofstad sou wees. Op Maandag 1857-02-23, word die Vierkleur op die plein gehys. Vermeulenstraat, Pretoria is na hom en sy broer "Kootjie", Jacobus Gerhardus Vermeulen, vernoem. Hendrik het in 1859 sy pa, Guilliam Christoffel, se Suidelike deel van die plaas, Hartebeestpoort geerf. Die plaas is in 1853 deur sy pa Guilliam Christoffel VERMEULEN en die se skoonseun, Frederik Jacobus Matthys DE BEER, van David Adolph Michael Botha aangekoop. Die oordrag van die plaas na Hendrik vind op 1859-10-28 plaas. In 1873 verkoop Hendrik sy gedeelte aan sy seun Jan Albert (f4), sy skoonseuns Guillaume Schoombe Pretorius en Willem Adriaan Fourie vir 105 pond elk. Op 1874-09-25 verkoop die drie die plaas aan die Duitser Hans Heinrich Mundt vir 'n bedrag van 1,400 pond. Oordrag van die eiendom geskied op 1875-03-22. 'n Gedeelte van die plaas staan vandag bekend as Die Wilgers. Silverton word ook later op 'n deel van die plaas aangelê. Die huis op die plaas (Guilliam se oorspronklike woonhuis) het die eiendom van die stadsraad van Silverton geword. Silverton is gedurende 1964 by groter Pretoria geïnkorporeer. In 1972 sken die stadsraad van Pretoria die huis en 'n gedeeltre van die grond aan die Nasionale Kultuurhistoriese en Opelugmuseum. Die huis heet vandag die Pioniersopelugmuseum. Morelettaspruit loop deur 'n gedeelte van die grond. Mundt se vrou was Aletta. Dit word vertel dat verbygaande reisigers Aletta geskreeu groet het met "Môre Letta". Morelettaspruit het so sy naam gekry. Hendrik het hom veral besig gehou met perdekoetsritte na Oos-Transvaal. Dat Hendrik 'n vername rol gespeel het in die openbare lewe vind ons o.a. ook in die volgende : In die Staatskoerant van 28.12.1871, 2/2, en 3.09.1872, 1/1, word hy as "lid van die Landkommissie aangewys". In die Staatskoerant van 10.07.1866, 2/1, word hy as Heemraadslid aangewys. In die Staatskoerant van 30.08.1873, 2/1, word hy as lid van die Heemraad herkies."

Met die Wêreld Rugbytoernooi in Japan wat 20 September 2019 begin, dink ek dit is gepas om die Vermeulens se betrokkenheid by Springbokrugby uit te lig.

- "4612 h5 **Dirk Jacobus Albertus VERMEULEN** <7365> (4599/x), * Vanrhynsdorp 29.07.1914, † Bellville 16.08.1966
 »∅ † Boedels in besit van die Meester/Staatsargiewe. Boedel verw. MOOC 4819/1966
 »» Kinders (3): 4613, 4614, 4617
 x Kaapstad 16.06.1941, **Martha Jacoba Maria (Merlé) COETZEE** <7385>, * 01.01.1919
 »✉ Merlé hertrou na Dirk Vermeulen se dood met **Dr. Daniël Hertman CRAVEN**, (Dok. CRAVEN), bekende akademikus, Springbok rugbyspeler (skrumskakel) en jarelange President van die Suid-Afrikaanse Rugbyvoetbalunie. (SARVU). Die huwelikregister toon haar name as Maria Jacoba Martha VERMEULEN, geb. COETZEE"
- "1401 i3 **Hannelie VERMEULEN** <4409> (1398/x), * Kroonstad 16.01.1967
 »✉ Hannelie is 'n voormalige Springbokswemmer. Sy het vir 'n periode van 11 jaar die SA rekord in vlinderslag gehou.
 x Kroonstad 09.12.1995, **Pieter Jacobus DU RANDT** <4412>, * 08.09.1972

»¶ Pieter is as Os bekend. Os het die Springbokke op die rugbyveld verteenwoordig en wel as voorryman. Hy speel provinsiale rugby vir die Vrystaat. Hy boer op die plaas Tama, tussen Theunissen en Brandfort. Die egpaar het twee seuns.”

“1243 h1 **Hendrina Johanna VERMEULEN** <4248> (1242/x), * Gasvryheid, Kopjes. 15.10.1894, † 21.05.1968

»¶ Die egpaar doop op 2 Maart 1913, in die NG Kerk, Kroonstad 'n dogter Debora Jacoba Retief SERFONTEIN, gebore 10 Desember 1912

»ø * NG Kerk rekords. Kroonstad gemeente. Huweliksregister

x Kroonstad 24.07.1912, **David Jacobus J SERFONTEIN** <4257>, * Roodeval, Kopjes 22.11.1885, † 07.09.1961

»x Die huweliksregister toon Hendrina as 'n 17 jarige dogter van Gastvryheid, Kopjes en David as 'n 27 jarige boer van Roodeval, Kopjes.

»¶ David en Hendrina is die grootouers van **Dr. Divan SERFONTEIN**. Divan is 'n mediese dokter en voormalige Springbokrugbyspeler (skrumskakel). In 1984 was hy SA. se kaptein. Die egpaar doop te Kroonstad in die NG Kerk, 'n dogter Heiltje Maria SERFONTEIN, * 19.7.1914, gedoop 14.2.1915.”

“4510 j1 **Daniel Johannes (Duane) VERMEULEN** <12736> (4509/x), * Nelspruit 03.07.1986

»¶ Daniel is as Duane bekend. Duane speel Super XV en Curriebekerrugby vir die Stormers/WP in 2011 as agsteman. Hy maak sy debuut vir die Springbokke op 8 Sept 2012 en het sedertdien al 46 keer vir die Springbokke uitgedraf as agsteman. Voorwaar 'n Vermeulen om op trots te wees.

»» Kinders (2): 4511, 4512

x Val de Vie Estate 08.12.2012, **Ezél VAN DER WALT** <17824>, * 10.07.1984

4511 k1 **Anru Johannes VERMEULEN** <17825> (4510/x), * Kaapstad 19.09.2013»¶ Inligting verstrek deur Ouma Estelien

4512 k2 **Zian André VERMEULEN** <18052> (4510/x), * Kaapstad 01.12.2016”

N.B. Duane het nou al 48 keer vir die Springbokke uitgedraf. In die 2 toetse vanjaar in Nieu-Zealand en in Argentinië as kaptein.

3879 h2 **Wynand Arnoldus VERMEULEN** <6650> (3877/x), * Britstown 18.03.1914, ~ NG Kerk, Britstown. 05.05.1914, † Vereeniging 12.07.1968

»ø † Boedels in besit van die Meester/Staatsargiewe. Boedel verw. MHG 7620/1968

»» Kinders (5): x{3880, 3882, 3885, 3886, 3888}

x NG Kerk, De Aar 07.09.1936, **Elsabé Maria VAN DER MERWE** <6655>, * Caledon 08.01.1911, † Vereeniging 08.05.1958

» Haar geboortedatum mag ook wees 9 Januarie 1911 Elsabé was voorheen met 'n MALAN getroud.

»ø † Boedels in besit van die Meester/Staatsargiewe. Boedel verw. MHG 8324/1958

xx **Aletta Cornelia PIENAAR** <6656>, * 21.02.1921, † 12.04.1985

» Aletta was die ouma van **Francois Pienaar**, die Springbok Rugbykaptein wat die Springbokke in 1995 op Ellis Park aangevoer het teen die All Blacks in die wêreldbekereindstryd en gewen het nadat Joel Stransky met 'n skepskop in ekstra speeltyd die wenpunte aangeteken het.

Hierdie storie verskyn in ons geslagsregister van Wessel Johannes Vermeulen RIN D <430>

“Sy geboortedatum mag ook 1 Oktober 1872 wees.

Ten tye van sy huwelik was hy 'n boer van Pearston en 24 jaar oud.
Met die doop van sommige van hul kinders in die NG Kerk, Pearston word aangedui dat hulle van "Hoop van Afrika" was.

'n Keindogter van Wessel, Anista van Huyssteen, gebore Campher, het die volgende tov haar oupa en die se broer Roelof Andries VERMEULEN opgeteken en word dit met haar toestemming in die Vermeulen geslagsregister geplaas :

""Die Vermeulen-gesin verloor Hoop van Afrika "".

'n Ouer broer van oupa Wessel, Roelof Andries, wat op 07.10.1869 in die Pearston-distrik gebore is, is met ouma Annie se oudste suster getroud. Sy was Aletta Johanna (Lettie) Els wat op 30.09.1876 gebore is en op 24.10.1961 in Noordeinde, Port Elizabeth oorlede is. (Roelie Vermeulen van George se oupa en ouma). Hy en oupa Wessel het albei op hul vrouens se erfdeel op Hoop van Afrika geboer. Roelf was 'n befaamde konsertinaspeler. As hulle moes plaaswerk doen, het hy gesit en konsertina speel. Wanneer lamtyd aangebreek het, was dit oupa Wessel se werk om die lammers kraal toe te dra terwyl Roelf se musiek oor die werf gedreun het. Roelf het glad sy eie dansorkes gehad, want sy seuns kon ook elkeen 'n musiekinstrument bespeel. Omdat die danse en partytjies sy skoonma, Sannie Els, teen die bors gestuit het, het hy besluit om sy vrou se erfdeel te verkoop en die plaas Echo Dale in Graaff-Reinet se distrik te koop. Net daar lê toe die knoop. Die nuwe plaas het baie meer gekos as wat hy vir die Pearston-plaas kon kry. Ouma Sannie moes maar borg teken dat hy die geld kon leen. Oupa Wessel was ontsteld. Hy het voorspel dat die kleine Echo Dale vir Hoop van Afrika sou insluk. Ma Sannie wou nijs van "Rolf" hoor nie; hy was duidelik haar gunsteling-skoonseun. Twee jaar na mekaar het hulle uitstekende reënjarre gehad en rekordoeste is ingesamel. Die een dansparty het op die ander gevolg en Roelf het hom glad nie oor sy skuld bekommer nie. Toe volg 'n ongekende droë jaar. Geen oes nie! Die skuldeisers slaan toe en ouma Sannie moet die verband waarvoor sy borg geteken het, betaal. Op dié manier verloor oupa Wessel en ouma Annie vir Hoop van Afrika. Gelukkig het oumagrootjie Sannie se broer Stoffel Lötter die plaas gekoop met die verstandhouding dat die Vermeulen-gesin daar kon aanbly. Oupa Wessel was van toe af 'n deelboer op die plaas.

*Die naam Roelof Andries kom van die Jansens af. Oupa Wessel se ouma aan moederskant was Elsie Elizabeth, die dogter van Roelof Andries Jansen en Elsie Elizabeth Vlotman.

Oupa Wessel en sy skoonma het nie eintlik om dieselfde vuur gesit nie. Sy het nie van hom gehou nie omdat hy nie vir haar stil gebly het nie. Een van haar geliefkoosde slegsê-uitdrukkings wanneer hulle twee in 'n argument betrokke geraak het, was: "Jou blinde heiden!" Van Oupa se kant af was die gevoel seker wederkerig. Na haar dood kon hy haar darem vir 'n goeie doel gebruik toe die plaaswerkers op een tydstip knaend die pluimvee gesteel het. Een nag het hy haar nagkabaai aangetrek, haar slaampus opgesit en die diewe in die hoenderhok gaan inwag. Net toe hulle elkeen 'n hoender of ™n gans onder die blad het, staan hy op en vra met 'n bewerige stemmetjie: "Hoekom steel julle Ounooi se gansies?" Onnodig om te sê, dit was die einde van die nagtelike diefstalle".

Die bestuur wil elke Bondslid en Vriend van die Bond alles wat mooi is toewens vir die toekoms..

Kontak ons gerus indien jy meer betrokke wil wees en onthou om jul inligting op te dateer, jul lief en leed met ons te deel en enige Vermeulen staaltjies, foto's en interssanthede aan ons te stuur.

Vriendelike Bondsgroete

Hennie Vermeulen

